

**■ COLUMNA**

# A revair QUOTI!?

DA ROMAN CAVIEZEL, CUIRA

**T**ge schoc! Tge trumpada colossala! Èsi propri vair che ti ma vuls liquidar? Mes bab, il grond Trump alpin, il tycoon local da l'editoria, vul crudavla-main assassinar ses agen sang, sia one and only Quotivanka? Na, serius, jau vegn narra. – E pertge jau e na il BT, u la SO, che portan, ina sco l'autra, tuttavia adina la medema pulenta? Tge hai jau fatg fallà, di, daddy? N'era jau betg in model da loialtad figliala? U na m'has ti forsa betg pudì mulscher avunda, en tut quels onns? Cun reclamas e subvenziuns, da chantun e confederaziun. Jau hai laschè far gugent, sas, affar è affar. Tge lur?

**T**i has franc emblidà cun quant plaschair che ti m'has schendrada avant dus decennis, plain entusiassem, cun tes vigurus sem dad interpretider editorial. Sem na rumantsch, en pli! Gea, quai è stà ina vaira miracla – ils Rumantschs na fissan garantì mai stads pipa da realisar mai – ed è in monument prominent per tai, il meritaivel stgaffider! E pir la satisfacziun cur che ti has vesì il fritg da quest generus act d'altruisssem cultural.



Insuperabla! E jau, jau era simplamain happy d'exister, d'astgar di per di infurmar mes lecturs rumantschs davart tut las puglinas da lunsch e da manaivel.

**P**ir avant duas emnas has ti anc organisà ina grondiusa festa per mes ventgavel anniversari. En tia tower a Cuir, tge onur. E mo per mai, cun pumpa e promis tut put. Jau avess pudì tschivlottar da legria. Grazia zunt fitg, papi. Ed uss l'annunzia da mort! Tgi ma chapescha quai?

**D**al reminent, sas ti che jau sun brutal loscha da tai? Da tia autoritad irproscha, da tes slantsch giuvenil – il grond but-tatsch ed ils givlars da tats na vesan ins gea betg sut il bel vestgì – e da tes tscharvè anc adina agilissim, che sgarguglia ad in sgargugliar.

Ideas genialas tut a dubel. Bun, cun l'olimpiada has ti tratg in zic la curta, malgrà la bellezza campagna autoritara ed unilateral da tias medias. Jau t'avess fitg gugent gidà, u betg, aber tge vuls far cun miserabels quatter milli abunents? Na fai nagins quitads perquai, per ina buna chausa po igl schon vertir ina giada ina tuppada. Quai che quinta è gea: Somedia first! – Persuenter è tes duel public cun Jon Pult stà ina sublima demonstraziun da cumpetenza retorica e da sabientscha politica! Pli che dign d'in monopolist da tes caliber.

**A**vant che finir anc in problem da famiglia: Jau sun preoccupada per mes frar Pesche. N'al duess ins betg trametter finalmain tar in psichiater? Ina midlife crisis è tuttina curabla. Uschiglio sto quest pover diavel anc ditg raser ora publicamain ses problems ils pli intims mintga fin d'emna. El ha bain schon da pugtag detg e ditg avunda cun ses sbagl da pronunzia.

**E**n confidenza, il plan da Emia mort è in fake, nevair? – Viva il Trump alpin, viva l'era postfactica! Ad multos annos!